

94-157

Siri Kenegaraan

---

# Pemerintahan Di Malaysia

---

Teh Rohaya Yusof  
Sulaiman Zakaria

Pustaka Mutiara  
Kuala Lumpur

APB  
708144

NASKHAR PENELIHARAAN  
PERPUSTAKAAN NEGARA MALAYSIA

28 DEC 1993

**PUSTAKA MUTIARA**  
D8, Taman Kok Doh  
Off Jalan Segambut  
51200 Kuala Lumpur  
Tel: 03-6887711/6887722

Cetakan Pertama 1993

**AMARAN ATAS HAKCIPTA**

Semua hak terpelihara. Sebarang bahagian dalam buku ini tidak boleh diterbitkan semula atau dipindahkan dalam sebarang bentuk atau dengan sebarang cara, baik dengan cara elektronik, mekanik, penggambaran ataupun sebaliknya tanpa izin yang bertulis terlebih dahulu daripada pihak Penerbit

ISBN: 983-73-0062-0 (Siri)

Dicetak oleh  
KOSNET PRESS SDN BHD  
KUALA LUMPUR

## **Prakata**

Perasaan cinta kepada negara harus dipupuk di kalangan kanak-kanak seperti kata peribahasa melentur buluh ketika masih rebung. Apabila perasaan ini sudah tersemai dalam hati setiap kanak-kanak, negara tidak akan menghadapi sebarang masalah seperti perpaduan dan sebagainya.

Buku-buku dalam Siri Kenegaraan memberi pelbagai pengetahuan kepada kanak-kanak sekolah seperti bidang pentadbiran, kebudayaan, keselamatan dan sebagainya. Pengetahuan ini amat berguna kerana mengenali Malaysia bererti cinta kepada Malaysia.

Semoga penerbitan buku-buku ini dapat menjawab soalan-soalan yang sentiasa dikemukakan oleh kanak-kanak sekolah tentang sebahagian daripada negara Malaysia.

Januari  
Kuala Lumpur

Penulis

## **PEMERINTAHAN DI MALAYSIA**

### **Pengenalan**

Sukakah kamu tinggal di Malaysia? Tentu kamu berasa gembira tinggal di negara ini. Malaysia sebuah negara yang aman dan damai. Rakyat hidup dalam sejahtera.

Jika kamu menonton televisyen, kamu akan melihat setengah-setengah negara berada dalam kekacauan. Peperangan dan rusuhan berlaku di negara-negara tersebut. Nyawa terkorban dan harta benda musnah.

Di Malaysia peperangan dan rusuhan seperti itu tidak berlaku. Hal ini disebabkan negara kita mempunyai sistem pemerintahan yang baik. Raja-raja dan pemimpin negara memerintah dengan adil. Mereka terdiri daripada orang yang bertanggungjawab.

### **DYMM Yang di-Pertuan Agong**

Malaysia sebuah negara beraja. Raja di



*Kanak-kanak selalu menjadi mangsa peperangan*

**Malaysia dikenali juga sebagai Raja Berperlembagaan.** Tahukah kamu apa makna Raja Berperlembagaan? Maksud Raja Berperlembagaan ialah raja tidak memerintah sendiri negara ini.

Pada masa dahulu, raja memerintah sendiri. Pada masa itu pemerintahan beraja disebut beraja mutlak. Beraja mutlak bererti raja memerintah dengan kuasa penuh.

Dalam sistem pemerintahan Beraja Berperlembagaan, Yang di-Pertuan Agong hendaklah mengikut Perlembagaan. Kuasa pemerintahan diberi kepada Perdana Menteri. Perdana Menteri pula dibantu oleh menteri-menteri.

Pada masa dahulu, semua negeri di dunia diperintah oleh raja secara mutlak. Lama-kelamaan negeri-negeri beraja ini hapus sebuah demi sebuah. Rakyat tidak suka lagi kepada pemerintahan beraja mutlak. Mereka suka kepada pemerintahan Beraja Berperlembagaan.


Pada hari ini hanya beberapa buah negeri beraja yang masih kekal. Negeri-negeri itu seperti Malaysia, Brunei Darussalam, Britain, Thailand, Arab Saudi dan lain-lain.

Kebanyakan negara hari ini diperintah oleh orang biasa yang dilantik menjadi Presiden. Negara-negara ini disebut republik. Antara negara-negara republik ialah Singapura, Filipina, Indonesia dan Amerika Syarikat.

Bagaimana Yang di-Pertuan Agong dilantik? Yang di-Pertuan Agong dipilih daripada sembilan orang sultan. Sultan ialah ketua bagi negeri-negeri beraja dalam Malaysia. Tahukah kamu mana negeri-negeri beraja itu?

Selain itu, terdapat juga negeri-negeri yang tidak beraja atau tidak mempunyai sultan. Negeri-negeri tersebut ialah Melaka, Pulau Pinang, Sabah dan Sarawak. Ketua bagi negeri-negeri ini dipanggil Yang Dipertua Negeri.

Selain sebagai ketua negara, Yang di-Pertuan Agong menjadi ketua agama Islam bagi



DYMM Yang di-Pertuan Agong ketua negara Malaysia

negara Malaysia. Yang di-Pertuan Agong menjadi pemerintah Angkatan Tentera Malaysia juga.

Yang di-Pertuan Agong akan memerintah negara selama lima tahun. Selepas itu akan dilantik sultan lain pula untuk menggantikan baginda. Sehingga ini sudah lapan orang sultan menjadi Yang di-Pertuan Agong.

Mungkin ada antara kamu yang pernah melihat bagaimana upacara pertabalan Yang di-Pertuan Agong dijalankan. Upacara tersebut dijalankan dalam suasana yang gilang gemilang mengikut adat istiadat raja-raja Melayu.

Yang di-Pertuan Agong dan Raja Permaisuri Agong akan diiring ke tempat duduk khas yang dipanggil singgahsana. Selepas itu setiap upacara dilakukan mengikut susunan yang telah diatur. Upacara ini dijalankan dengan disaksikan oleh pembesar-pembesar negara ini dan negara-negara asing.

Upacara ini dijalankan di Istana Negara. Tahukah kamu tentang Istana Negara? Istana

Negara tempat Yang di-Pertuan Agong bersemayam. Istana ini terletak di Kuala Lumpur.

Biasanya Radio dan Television Malaysia akan menyiaran upacara ini secara langsung supaya dapat ditonton oleh semua rakyat Malaysia. Lagipun upacara ini dapat ditonton sekali dalam lima tahun.

Sekiranya ada lagi upacara pertabalan ini disiarkan di televisyen, eloklah kamu menonton bersama keluarga. Dengan cara ini kamu akan lebih memahami tentang ketua negara kita.

## Parlimen

Tahukah kamu di mana letaknya bangunan Parlimen? Bangunan ini terletak berhampiran dengan Taman Tasik Perdana di Kuala Lumpur. Taman Tasik Perdana terletak tidak jauh dari pusat bandar raya. Mungkin ada antara kamu yang pernah melawat bangunan Parlimen.

Bangunan Parlimen ialah lambang pemerintahan demokrasi. Tahukah kamu maksud



*Bangunan Parlimen*

demokrasi? Pemerintahan demokrasi ialah pemerintahan dari rakyat oleh rakyat dan untuk rakyat.

Parlimen ialah tempat undang-undang dibuat oleh pemimpin-pemimpin negara kita. Di Parlimen terdapat dua buah dewan. Dewan-dewan itu ialah Dewan Tertinggi yang digelar Dewan Negara. Sebuah dewan lagi ialah Dewan Rendah yang dikenali sebagai Dewan Rakyat.

Di Dewan Rakyat terdapat 177 orang ahli. Mereka ini disebut Ahli Parlimen. Di Dewan Negara pula terdapat 69 orang ahli yang dipanggil Senator. Ahli Dewan Rakyat dipilih melalui pilihan raya. Mereka disebut juga sebagai wakil rakyat. Mereka mewakili negeri-negeri di Malaysia. Senator dilantik oleh Yang di-Pertuan Agong.

Apakah itu pilihan raya? Pilihan raya ialah cara untuk memilih pemimpin. Pada hari pilihan raya diadakan, semua rakyat Malaysia yang layak pergi mengundi. Siapakah yang layak mengundi?


Orang dewasa yang berusia 21 tahun ke atas boleh mengundi. Pernahkah kamu mengikut ayah, ibu, abang atau kakak kamu pergi mengundi? Bagaimanapun, kamu tidak boleh memasuki kawasan mengundi.

Sebagai rakyat Malaysia yang telah dewasa, kita berhak mengundi. Kita akan memilih pemimpin yang kita sukai. Pemimpin-pemimpin yang menang dalam pilihan raya ini akan menjadi Ahli Parlimen atau Ahli Dewan Undangan Negeri.

Undang-undang yang dibuat di Parlimen mestilah dipatuhi oleh setiap orang. Semua negara mempunyai undang-undang supaya rakyat dapat hidup dalam aman dan damai. Antara undang-undang yang terdapat di Malaysia ialah undang-undang lalulintas.

Sekiranya kamu menaiki kereta bersama bapa ataupun menaiki bas, kamu akan dapati semua kenderaan akan berhenti apabila lampu isyarat jalan raya bertukar kepada warna merah.

Apabila lampu isyarat bertukar menjadi



*Polis Traffik mengawal keselamatan jalan raya*

warna hijau barulah kenderaan bergerak semula. Undang-undang lalulintas ini penting untuk mengelakkan daripada terjadi kemalangan jalan raya.

Undang-undang jenayah menyekat rakyat negara ini melakukan jenayah. Maksud jenayah ialah perbuatan mencuri, merompak, mencederakan orang dan membunuh. Orang yang melanggar undang-undang akan dikenakan hukuman. Sekiranya kesalahan yang dilakukan kecil, hukuman yang dikenakan ringan sahaja. Pesalah dikehendaki membayar denda dengan jumlah wang yang sedikit.

Sekiranya kesalahan yang dilakukan itu besar, hukuman yang dikenakan berat. Pesalah mesti membayar dengan jumlah wang yang banyak. Mereka yang merompak tidak boleh membayar denda. Mereka mesti dipenjarakan. Jenayah yang terbesar ialah membunuh. Pembunuhan akan dikenakan hukuman mati.

Orang yang mengawasi undang-undang ini dipatuhi atau tidak ialah polis. Polis akan


menangkap orang yang disyaki bersalah. Orang itu akan dibicarakan di mahkamah. Perbicaraan dijalankan di hadapan hakim. Orang yang dituduh itu menggunakan peguam. Hakim akan menentukan orang itu bersalah atau tidak.

Tentu sekolah kamu mempunyai undang-undang juga. Kamu akan ditangkap oleh pengawas sekiranya membuang sampah merata-rata, membuat bising di dalam kelas, mencuri barang kepunyaan kawan kamu dan sebagainya.

Kamu mestilah mematuhi undang-undang sekolah supaya keadaan sekolah menjadi aman damai. Sekolah tempat belajar dan tempat ini mestilah dalam keadaan yang baik.

### Perlembagaan

Apakah yang kamu tahu tentang perlembagaan? Perlembagaan ialah undang-undang dasar untuk membentuk sesebuah negara. Pemimpin-pemimpin negara hendaklah mengikut undang-undang ini. Siapa pula yang membuat undang-undang ini? Orang yang




*Orang yang bersalah dibicarakan di mahkamah*

membuat undang-undang ini tentulah mereka yang bijak dalam undang-undang.

Perlembagaan negara kita dikenali sebagai Perlembagaan Persekutuan Malaysia. Dalam perlembagaan tertulis agama Islam sebagai agama rasmi. Hal ini disebabkan sebahagian besar rakyat Malaysia beragama Islam. Ramai pemimpin yang memerintah negara kita beragama Islam juga.

Walaupun agama Islam agama rasmi, agama-agama lain boleh diamalkan di Malaysia. Agama-agama itu ialah agama Buddha, Hindu dan Kristian. Sebab itulah selain masjid, kamu juga boleh melihat tokong, kuil dan gereja didirikan di negara ini. Rakyat yang berlainan agama hidup bersatu padu. Yang penting mereka mahu hidup berbaik-baik antara satu sama lain.

Sekiranya kamu seorang Islam, mungkin kamu mempunyai kawan-kawan yang menganut agama lain. Mungkin jiran kamu menganut agama Hindu, Buddha atau Kristian. Ini



*Penganut agama Kristian bersembahyang di gereja*

menunjukkan rakyat Malaysia bebas mengamalkan agama masing-masing.

Perlembagaan negara ini menyatakan juga bahawa bahasa Melayu Bahasa Kebangsaan negara ini. Ini bermakna bahasa Melayu bahasa utama di negara ini. Setiap rakyat Malaysia sepatutnya tahu bercakap dalam bahasa Melayu. Dahulu bahasa Melayu dikenali sebagai bahasa Malaysia.

Bahasa-bahasa lain boleh digunakan di negara kita. Hal ini disebabkan di negara kita terdapat berbagai-bagai kaum. Kaum-kaum itu ialah Melayu, Cina dan India. Kaum-kaum di Sabah dan Sarawak mempunyai bahasa-bahasa yang tersendiri.

Bahasa Inggeris digunakan juga di negara kita. Biasanya bahasa Inggeris digunakan oleh pelbagai kaum. Pada masa dahulu, bahasa Inggeris dijadikan bahasa utama negara ini. Pada masa itu terdapat sekolah-sekolah Inggeris.

Kamu tentu tahu di negara kita terdapat



*Dewan Bahasa dan Pustaka*

Sekolah Rendah Jenis Kebangsaan Tamil dan Sekolah Rendah Jenis Kebangsaan Cina. Ini membuktikan kerajaan membenarkan bahasa-bahasa lain digunakan di Malaysia ini. Kanak-kanak Cina dan India mempelajari bahasa ibunda mereka sebelum mempelajari bahasa Melayu.

**Mengapakah perlunya Bahasa Kebangsaan?** Bahasa Kebangsaan perlu supaya rakyat dapat bersatu padu. Kalau kaum-kaum di negara ini tidak mempelajari bahasa Melayu bagaimana mereka hendak berhubung?

Di Sekolah Rendah Jenis Kebangsaan Tamil atau Cina diajar bahasa Melayu. Lama-kelamaan mereka ini pandai berbahasa Melayu seperti orang Melayu. Barulah mereka layak menjadi warganegara Malaysia

### **Perdana Menteri**

Pernahkah kamu bercita-cita hendak menjadi seorang Perdana Menteri? Kalau kamu hendak menjadi seorang Perdana Menteri, kamu mestilah belajar bersungguh-sungguh. Seorang



*Perdana Menteri pemimpin utama negara*

Perdana Menteri mestilah mempunyai pelajaran yang tinggi, bijak, pandai memimpin dan disukai ramai.

Di negara kita, Perdana Menteri dilantik oleh DYMM Yang di-Pertuan Agong. Yang di-Pertuan Agong menyerahkan kuasa pemerintahan kepada Perdana Menteri. Perdana Menteri disebut sebagai ketua kerajaan.

Perdana Menteri memerlukan ramai pembantu. Oleh sebab itulah Perdana Menteri melantik menteri-menteri lain. Menteri-menteri ini membantu beliau memerintah negara kita. Menteri-menteri terdiri daripada lelaki dan wanita. Tahukah kamu berapa ramai menteri di negara kita?

Perdana Menteri mempunyai kementeriannya sendiri yang dipanggil Jabatan Perdana Menteri. Seorang Perdana Menteri mempunyai tanggungjawab yang besar. Kamu tentu biasa melihat di televisyen atau membaca akhbar tentang Perdana Menteri kita.

Beliau sentiasa melawat negara-negara luar. Lawatan itu bukanlah untuk bercuti atau makan angin. Perdana Menteri membuat lawatan tersebut supaya negara kita bersahabat dengan negara-negara lain.

Lawatan di dalam negeri pula untuk melihat kemajuan yang dicapai. Negeri-negeri yang mundur dibantu supaya lebih maju. Beliau mahu semua rakyat hidup aman dan makmur.

### **Menteri-Menteri**

Menteri-menteri di Malaysia dilantik bertujuan meringankan tugas Perdana Menteri. Setiap menteri menjadi ketua sebuah kementerian, sebagai contoh Kementerian Pertahanan. Kementerian ini diketuai oleh Menteri Pertahanan.

Tugas menteri ini ialah mengawasi Angkatan Tentera Malaysia, membeli senjata dan sebagainya. Tugas menteri pertahanan ini sangat berat.

Beliau memastikan negara kita berada dalam keadaan aman dan damai. Semua ancaman musuh akan ditentang oleh anggota tentera yang taat setia.

Sebuah kementerian lagi yang terdapat di negara kita ialah Kementerian Pendidikan yang diketuai oleh Menteri Pendidikan. Menteri Pendidikan mempunyai tugas yang berat juga.

Sekolah-sekolah dan universiti-universiti yang dibina di negara kita di bawah pengawasan kementerian ini. Menteri Pendidikan memastikan semua rakyat Malaysia mendapat pendidikan secukupnya.

Rakyat yang mempunyai pendidikan boleh memajukan negara. Sekiranya semua rakyat Malaysia mendapat pendidikan yang sempurna negara akan bertambah makmur. Negara memerlukan orang bijak dan berpendidikan tinggi untuk sama-sama membangunkan negara ini.

Kementerian-kementerian lain ialah Kementerian Pertanian, Kementerian



*Salah satu kementerian yang ada di Malaysia*

Kebudayaan, Kesenian dan Pelancongan, Kementerian Penerangan, Kementerian Perusahaan Utama dan lain-lain lagi.

Pernahkah kamu mendengar Menteri Tidak Berportfolio? Apakah Menteri Tidak Berportfolio ini? Menteri Tidak Berportfolio ialah menteri yang tidak mempunyai kementerian sendiri seperti menteri-menteri yang disebutkan di atas tadi. Menteri Tidak Berportfolio menjalankan tugas-tugas khas yang diberi oleh Perdana Menteri.

Bilangan menteri yang ada di negara kita sekarang sejumlah lebih kurang 30 orang. Jumlah ini akan bertambah dari masa ke masa. Tahukah kamu berapa orang menteri yang memerintah negara ini ketika mencapai kemerdekaan?

Sekiranya negara kita bertambah makmur dan membangun, tugas menteri menjadi semakin berat. Ketika itu kementerian-kementerian baharu diwujudkan lagi.



*Datuk Seri Rafidah Aziz menteri wanita di Malaysia*

Setiap tahun upacara khas diadakan di Tugu Kebangsaan. Upacara ini bertujuan mengenang kembali pahlawan-pahlawan yang telah gugur ketika menentang pengganas komunis.

Upacara khas ini diadakan pada Hari Pahlawan. Pada hari itu, pemimpin negara dan pemimpin tertinggi angkatan tentera akan meletakkan kalungan bunga pada tugu ini.

Pernahkah kamu ditugaskan untuk mengutip derma pada Hari Pahlawan? Derma ini untuk membantu tentera yang tercedera dan anggota keluarga mereka yang terbunuh.

Tugu Kebangsaan ini akan mengingatkan kamu pada perjuangan anggota pasukan keselamatan kita.

Kamu patut berbangga kerana dengan perjuangan merekalah, negara kita menjadi aman dan makmur. Kita berdoa supaya roh mereka dicucuri rahmat oleh Tuhan.



*Bunga mawar menjadi pilihan juga*

## Bunga Raya

Ramai antara kamu tentu kenal bunga raya. Bunga raya ada pelbagai jenis mengikut warna masing-masing. Bunga raya ada yang berwarna putih, oren, ungu dan merah hati.

Bunga raya penting bagi negara kita. Tahukah kamu mengapa? Bunga raya ialah Bunga Kebangsaan negara kita. Bunga raya telah menjadi Bunga Kebangsaan negara sejak tahun 1960. Pada tahun itulah bunga raya diisyiharkan sebagai Bunga Kebangsaan Persekutuan Tanah Melayu.

Bagaimanakah bunga raya terpilih sebagai Bunga Kebangsaan? Pada akhir tahun 1958, Kementerian Pertanian telah mengemukakan tujuh jenis bunga untuk dipilih.


Bunga-bunga itu ialah bunga kenanga, bunga raya, bunga melur, bunga teratai, bunga mawar, bunga sempaka dan bunga tanjung. Kenalkah kamu bunga-bunga tempatan ini?

Kerajaan telah meminta pandangan rakyat untuk memilih bunga yang akan menjadi Bunga Kebangsaan. Pada mulanya bunga mawar telah mendapat undi terbanyak terutamanya daripada penduduk Pantai Timur.

Penduduk Pantai Barat pula memilih bunga melur. Bagaimanapun akhirnya, kerajaan telah memilih bunga raya untuk dijadikan Bunga Kebangsaan.

Tahukah kamu mengapa bunga raya terpilih? Bunga raya terpilih berdasarkan beberapa perkara. Perkara yang pertama ialah warna. Warna bunga raya yang merah mengatasi warna bunga-bunga yang lain. Warna merah warna terang. Tahukah kamu pengertian warna merah? Warna merah ertiinya berani.

Warna merah pada bunga raya melambangkan gembira, girang dan gilang-gemilang juga. Kelopak bunga raya lebar dan melentur. Warna yang hidup itulah yang menyebabkan bunga raya terpilih.



*Bunga raya di pusat bandar*

Bunga raya tidak kurang cantiknya jika dibandingkan dengan bunga-bunga lain. Pokok bunga raya juga berbunga sepanjang masa tidak seperti bunga-bunga lain. Cara menanam bunga ini mudah juga. Kamu cuma perlu memotong dahan pokok bunga ini dan menanam dahan pokok bunga ini ke dalam tanah.

Keistimewaan bunga raya yang terakhir ialah bunga ini terkenal di kalangan masyarakat negara kita. Tahukah kamu bahawa pokok bunga raya ditanam untuk dijadikan pagar rumah? Ramai penduduk negara kita yang menjadikan pokok bunga raya sebagai pokok pagar rumah.

Lambang-lambang negara begitu penting untuk seluruh rakyat dan pemerintah. Mungkin pemerintah negara ini akan mengalami kesukaran untuk menyatakan rakyat negara ini yang berbilang kaum jika tidak ada lambang negara.

Kamu patut berbangga menjadi rakyat Malaysia. Negara Malaysia negara yang aman kerana rakyat sentiasa hidup bersatu padu.